

**Headline** Generasi muda diingat perteguhkan perpaduan  
**Date** 04. Sep 2008 **Language** MALAY  
**Media Title** Berita Harian **Page No** 20  
**Section** Hip **Article Size** 555 cm2  
**Circulation** 217920 **Frequency** Daily  
**Readership** 2083000 **Color** Full Color  
**AdValue** 9830.46



# Generasi muda diingat perteguhkan perpaduan

Oleh Rashiqah Ilmi Abd Rahim  
rashiqah@bharian.com.my

**M**ESEJ dan pesan patriotik yang mengisi jiwa masyarakat dengan erti serta semangat kemerdekaan menguasai pentas Malam Apresiasi Puisi dan Seni Budaya Gemilang Kemerdekaan ke-51 di Menara Majlis Perbandaran Ampang Jaya (MPAJ), Pandan Indah, Ampang baru-baru ini.

Malam baca puisi anjuran Persatuan Penulis Kuala Lumpur (Kalam) itu, menampilkan gabungan birokrat, penyair, penyanyi lagu puisi dan pelajar berbilang kaum membacakan puisi dengan cara tersendiri serta membuktikan puisi mampu menyatukan masyarakat majmuk di pentas sastera.

Majlis yang mendapat kerjasama Persatuan Penduduk Jalan Saga 7 Taman Saga Ampang (Pesaga 7), Jabatan Kebudayaan dan Kesenian Negara, MPAJ dan Pejabat Pelajaran Daerah Hulu Langat itu, turut berjaya memikat kira-kira 150 penonton, sekali gus memberikan kejayaan kepada penganjur kerana jumlah kehadiran yang dianggap besar untuk program baca puisi.

Pentas puisi yang diadakan sempena menyambut Hari Kemerdekaan ke-51 itu dibuka dengan deklamasi puisi oleh Pengarah Jabatan Belia dan Masyarakat MPAJ, Sarodin Shahri bertajuk *Gentar Merdeka* karya Esah Muhd Salleh yang memberi kesedaran kepada masyarakat agar tidak hanyut dan terpengaruh de-

## Puisi mesej patriotik, perpaduan kuasai pentas



**SEMANGAT MERDEKA:** Puisi Keindahan Budi disampaikan Ismail dengan sepenuh hati.

ngan budaya asing sekiranya masih cintakan tanah air.

Sarodin melontarkan banyak peringatan kepada penonton terutama kalangan generasi muda supaya memperteguhkan perpaduan dan mengelakkan daripada perpecahan, sebaliknya berusaha mengangkat martabat bangsa serta negara.

*Kepada mereka yang leka diulit mimpi yang lena dibuat ilusi yang lena hanyut lupa diri yang bercakaran ideologi yang berbalah sesama sendiri*

*Ingat musuh sedang menanti*

*di kiri dan kanan memandang dengan mata iri*

Pensyarah Universiti Putra Malaysia (UPM), Siti Raihani Mohd Saa'id, mencuri tumpuan pada malam itu lewat deklamasi puisi ala-gurindamnya *Guru* yang disampaikan secara menyindir tetapi dengan nada jenaka sehingga menggetek ramai penonton termasuk pelajar.

Raihani meluahkan renungannya yang tersirat secara berbalas untuk menegur sikap pelajar masa kini yang tidak lagi menghormati dan menghargai jasa guru sehingga menganggap mereka sebagai

generasi yang masih dijajah walaupun negara sudah pun bebas daripada cengkaman penjajah asing.

*Pelajar sekarang muda dan manja bukannya hendak mengikut kata mengirim cikgu surat berjela surat saman dan surat cinta*

*Jasa guru amat besar tidak terbalas segala bakti segala ilmu dicurah ikhlas mengajar murid baik yang rajin mahupun malas adakala sampai bertumbuk di dalam kelas*

Tidak ketinggalan Pegawai Pelajaran Daerah Hulu Langat, Ismail Musa, yang menyampaikan puisi *Keindahan Budi* dengan menjwai diksi dan bait puisi itu sepenuh hati untuk meluahkan keceakan kagum terhadap kecekalan yang dihadapi pejuang kemerdekaan, selain turut menegaskan perasaan taat setianya terhadap tanah air.

*Moyang kami yang papa mesra berbudi bahasa mati terantai kakinya tercelik hampa matanya tanah pusaka raya indah subur melata untuk kita warisnya penyambung cerita duka*

*Untaian masa bertunda memucatkan warna muka ulangan cahaya menjelma tiada kedua kami masih berbahasa masih berbudi juga sedang tangan raksasa mencekik bengis mangsanya*

Malam baca puisi itu turut dimeriahkan dengan bacaan puisi Datuk Dr Ahmad Kamal Abdullah, Datuk Norliza Rofli, Rahimudin Zahari, Harlym Yeo, Ayu Sari MJ dan Abdul Hamid Hussain, selain lagu puisi oleh Zubir Ali serta kumpulan Harmoni.

Pentas puisi juga diserikan dengan nyanyian Aisyah dan persembahan tarian kebudayaan Cina oleh Sekolah Jenis Kebangsaan Cina Kampung Baru Ampang serta ikrar Rukun Negara oleh Sekolah Kebangsaan (SK) Taman Kosas.



**HEBAT:** Siti Raihani mencuri tumpuan dengan puisi gurindamnya, *Guru*.



**TENANG:** Sarodin turut melaungkan perpaduan dalam puisi *Gentar Merdeka*.